

“JICA” vakillari Samarqand veterinariya meditsinasi institutida bo‘ldi

19/01/2022 - 18:10



Yaponiya xalqaro hamkorlik agentligi — “JICA” vakillari Veterinariya va chorvachilikni rivojlantirish davlat qo‘mitasi mutasaddilari hamrohligida Samarqand veterinariya meditsinasi institutiga tashrif buyurdi.

Janob Yoshi Sanning ma‘lumot berishicha, ayni kunda Yaponiyadagi 16 ta davlat oliygohlarida veterinariya mutaxassislari tayyorlanadi. Bundan tashqari yana 6 ta xususiy oliy o‘quv yurtida ham mazkur yo‘nalishda ta‘lim beriladi. Davlat ta‘lim muassasalarining har birida yiliga 35-40 nafar talaba veterinariya bo‘yicha o‘qishga qabul qilinadi. Xususiy institutlarda esa bu ko‘rsatkich 100-120 nafarni tashkil etadi.

Yuqumli kasallikliklar bo‘yicha mutaxassis bo‘lgan doktor Yoshixito o‘z faoliyati haqida hikoya qilarkan, dunyoning ko‘plab rivojlanayotgan mamlakatlarida ko‘ngilli sifatida ishlaganini, Buyuk Britaniyaning Liverpool universitetida doktorlik ishini himoya qilgach, Yaponiya xalqaro hamkorlik agentligida ekspert sifatida faoliyatini davom ettirayotganini aytdi. Agentlik tomonidan O‘zbekistonda chorvachilik sohasi bo‘yicha amalga oshirilishi ko‘zda tutilayotgan loyihalarda Samarqand veterinariya meditsinasi instituti olimlari va tadqiqotchilari bilan yaqindan hamkorlik qilish nazarda tutilganini bildirdi.

Samarqand veterinariya meditsinasi instituti rektori, professor Xudaynazar Yunusov xalqaro ekspertning bu taklifi uchun minnatdorlik bildirib, hamkorlikka tayyor ekani, oliy ta‘lim muassasasining nufuzli horijiy hamkor tashkilotlari yana bittaga ko‘payganini mamnunlik bilan e‘tirof etdi. Markaziy Osiyo mintaqasida yagona bo‘lgan Samarqand veterinariya meditsinasi instituti faoliyati va bugungi salohiyati haqida ma‘lumot berildi.

Muloqot davomida dunyoda roʻy berayotgan epidemiologik vaziyatda umumiy tashabbuslar va loyihalarni amalga oshirishda ishlarni tizimli tashkil etish, jarayonlarni yanada jadallashtirish zarurligi yuzasidan oʻzaro fikr almashildi.

Veterinariya va chorvachilik sohasiga “JICA”ning texnik hamkorlik loyihasi mablagʻlarini yoʻnaltirishning maqsadga muvofiqligini tahlil qilish maqsadida mamlakatimizda mehmon boʻlib turgan mazkur agentlik vakillari tashrifi davom etmoqda.
